

四庫全書

集部

欽定四庫全書

騎省集卷二十六

宋 徐鉉 撰

揚州府新建崇道宮碑銘并序

有天地然後有萬物有萬物然後有君臣有君臣然後有教化教之大者當由其本則大道是已夫道積乎中動合於真故能舉堯舜周孔之法奮禮樂刑政之用若道不在焉而守其蓬廬則莊周於是糠粃仁義輪扁於

是糟粕古書矣夫孝本思養而宗廟簋簋所以致孝也
道本勤行而宮館壇墀所以尊道也為政者有能原聖
人之真以垂憲崇列真之宇以薦誠其殆庶乎廣陵大藩
四海都會制度之盛雄視諸侯土德既微三災斯戾故
井邑屢變城郭僅存皇宋膺圖更造區夏雖天寶輔德
亦世而後仁今上嗣位之六年詔太常博士孫君邁佐
理斯郡君服膺古訓得意玄關以為教之不興民之安
仰於是相爽塏之地即清曠之墟創朝修之宮奉玄元

之御當崇墉之左次俯合瀆之東涯出俸錢以圖置運
心精以經席班倅方集畚鍤既興未及僦功移典秋浦
同聲之應千里非遙太子右贊善大夫潘君若冲負儒
雅之才韞恬淡之量允膺朝選代撫斯民庶政交修能
事畢舉惟茲靈宇既有成規於是揆日庀徒克終懿績
若乃殿堂階楯之制閤閤罍罍之列或躊躇以開宴或
寗寗而曼延眸容肅穆仗衛紛繹搖太霄之佩植紫旄
之節拊泗濱之磬扣豐山之鐘歛若經閭風而歷琳房

飄如排玄雲而揖岳露風亭月觀之地紫氣浮空歌臺舞閣之基芝英擢秀學者假筌蹄而有得游者甘藥餌而斯留霽然福鄉不變浮俗既畢雲構乃揚王庭有詔賜名曰崇道大矣哉聖人在上墜典咸修自成畏壘之區何假崆峒之問是宜刻於樂石紀在方書某也素為道民嘗學史氏以文見屬所不獲辭銘曰

大哉道原湛然常在其質無象其功不宰君子得之勤行不怠勤行伊何啟煥靈場乃闢隙荒乃築宮牆峨峨

高門屹屹崇堂祀事孔明玄儀載光淮海惟揚九州之
與厥民伊何富庶而教天仰靈祇人知至道咨爾三方
是則是倣崑岡北峙邗水南道聖日麗天真氣盤空煒
煒煌煌崑崙熊熊道民作頌永播皇風

洪州奉新縣重建閭業觀碑銘

道之為體也大大則衆無不容道之為用也柔柔則物
莫與較南方之強也故沖氣之所萃異人之所生壇館
之所宅景福之所興相乎域中南楚為盛先聖之論豈

誣也哉洪州奉新縣閭業觀者案方志西晉邑人劉真君之所居也真君名道誠以經明行修仕至刺史郡守金行不競仁獸非時知幾之賢有道之士卷懷而退修之於鄉玄德陰功之積昭受靈貺故真君辭張邴之祿追茅許之風單車還家勤行不息以永嘉二年八月十五日舉族上升藹爾福鄉依然舊址錦帷乍降玉舄長留後學瞻望若仲尼之闕里遺民思慕如召伯之甘棠梁大同元年乃建為觀爾其豫章垂蔭洪井儲靈華林蒼

翠當其陽馮水清冷環其域烟霞韜映竹樹青葱居然
人境之間自是仙游之地載祀四百朝市三移封域之
間英靈不泯鹿巾霞帔之士往往冥升搢紳縫掖之流
時時傑出存諸舊史是號名區土德既微羣方構難
城有復隍之患室多撓棟之凶乃眷殊庭俄悲閭戶而
瓊蘊之所秘霜鐘之所懸屹涵麗譙儼然對峙有道門
都監余守微者翦除宿莽草創精廬苦節忘形五十餘
載修心以化俗傳法以度人入室弟子龔紹元吳紹甄

皆能肅奏真科祇稟遺訓惟鄉人之善者知歲計之有餘高士胡君名仲克延慶簪纓息機丘壑師黃老之術以虛方寸躬曾閔之行以睦閭門博施濟衆斯謂仁智以為集靈之館祈福之場陋而不度民將安仰於是揆時屬役即舊謀新詢謀僉同詭信咸萃增湫下為爽塏易卑室為崇宮棟宇之設則因夫故基制度之中則考於經法凡殿堂門闕星室廚廩延袤周徧殆且百區三尊衆真羽儀侍衛精嚴肅穆不可為狀履端闡進廣庭恍

然如從汗漫之游即瑤階瞻玉座竦然若奉武夷之會
既而息徒已事日吉辰良明祀以告成功精意以答真
佑舉然旌之節搖太霄之佩燃九華之燭奏空洞之章
星斗迴光烟雲改色青天白日夫豈遠哉於時胡君以
姻睦之行慈惠之澤閭里稱舉郡國升聞詔書褒美特
加旌表揭以雙闕蠲其追胥江楚之間以為盛事是知
玄風之被俗聖政之化人變魯至道見於今矣夫如是
則可以傳芳金石垂裕初雲俾乎好道之徒益勵齊賢

之志云爾其銘曰

大道無名得之為真矯矯劉君知幾其神遜爾侯社上
為帝賓維梓之地甘棠之人峙此仙祠章江之濱華表
未歸桑田已改舊井誰漂高臺尚在不見芝英猶芳蘭
茝佳氣鬱葱如將有待彼美胡君州閭之英世味道腴
家傳義聲歸誠玉闕奉贄金籙易此頽構化為殊庭乃
眷福鄉實惟南楚閒館相望飈輪交午真圖秘錄唯仁
是與刻頌貞珉永歸終古

洪州西山重建應聖宮碑銘并序

先儒有言曰山者宣也宣氣生萬物者也然則崇岳巨鎮蓋氣之雄者也其間靈峰奇岫又氣之粹者也是故帝以會昌神以建福感而生聖賢宅而為洞天奇怪恍惚非尋常所能測已西山者作鎮荆楚雄視衡巫勢靡迤而和暢動清虛而巍峩動植滋茂樵隱閒安維昔之洪崖先生實居於此洪井之右澗水之濱喬木森羅古壇猶在長阜迴抱是續鸞岡北隅特高仍有伏龍之號

唐乾元初山人申太芝上言其地有異氣詔於此立應
聖之宮抗玄元正殿於其前塑肅宗聖容於其上繚垣
觀闕仰法於紫宮路門納階取規於丹禁光靈煥爛薦
獻精嚴上士勤行守臣莅職秩祀之盛莫之與京廣明已
還三災在運望拜之地闕而莫修遼東之鶴徒還絳縣
之人已老甲辰歲有道士王守玄者緋山仙裔茅嶺名
流受命藩侯來膺道任翦荆棘於高閼之址構茅茨於
隆棟之基不出焦光之廬自化庚桑之俗善言邇遠馴

致其功二十許年克甄舊制入室弟子劉德淳氣沖貌
肅節苦行高恪恭以居次謙和以接物既嗣其業遂成
厥終又十餘年締構云畢凡內外殿宇百有餘區材用
善良工藝堅密其藻飾也不踰奢儉之節其廣袤也足
展朝修之儀祕殿深嚴靈壇博敞睟容穆若列侍參然
鐘磬在懸苾芩具薦燦旭景於軒檻延夕月於甍題蕭
寥空洞之音希夷颺歛之御邈哉真境無得而名鉉爰
在弱齡服膺至道先君頃參郡乘嘗莅斯邦依然棠樹

之人自是桐鄉之邑乃以庚申歲遷奉松檟卜兆於鸞岡之陽敢言折臂之祥願占維桑之地明年復以主事再至山中祠虛皇於緇帷之宮投龍簡於天寶之洞所經靈跡實與幽尋又是山有寶光初至之夕邇見於中峰之上下至山麓倏忽聚散狀如野燎而精明眩目不可正視澗中有盤石石有三藥曰歲端午日未曙前常有擣藥之迹餘滓在焉水流至此甘香如蜜取以灌漱心府瑩然斯皆載於舊經新所覆視者也此山登晨之

士接武而洪崖為之冠列仙之墟連屬而洪井為之宗
然則閭風玄圃之在人間者也宜其篆刻金石永齊穹
壤鄙儒不佞敢作銘曰

江之右楚之區峙靈岳為仙都洪井濱鸞岡隅建清宮
應真符廢而興神之扶宮既成道既行校三官朝百靈
集景福薦皇明復淳化遂嘉生億萬年流頌聲

驪山靈泉觀碑銘

蓋聞邃古洪荒既表大庭之車皇猷炳煥亦尊軒后之

臺是知聖哲相因比千年於旦暮質文遞用歷三正以
循環斯之謂至公斯之謂不朽頌聲所作冊府存焉若
乃天地絪縕陰陽孕毓神臯天府莫為王者之居靈液
甘泉出奉聖人之用丹甌不炊而自熟溫谷不爨而自
燃神妙無方所以存而勿論蕩滴難老所以酌而不竭
矧夫西都舊國東井垂芒終南太一寓其精洪河清渭
均其潤湛然神井冠此崇址據九州之膏腴備萬乘之
湯沐固可以筌蹄衆壑畎澮百川猗歟無得而稱已在

昔唐之方有德也稟包壺之道訓受羊角之禎符奄四海而為家綿六葉而愈盛教宗玄默心寄窈冥卷領結繩幾致華胥之俗鳴鑾弭節常從汗漫之期輿馬之音朝行而夕至玉帛之會天動而雲臻孝惟奉先仁不忘本乃於山之北趾建華清之宮玄元之御當陽而玉瑩五聖之像列侍而星環別館離宮連甍接棟朝元長生紀其號霓裳羽衣播其聲至誠所通純嘏來應太平之運五十斯年三代已還未始有也及夏庭兆釁戲水撻

災因室之亂雖平厭世之游遂往金莖露掌但有餘基
樂水雲謠聊無嗣響而巋然真宇儼若清都同光中初
殄國讐永懷舊物載賡成制肅奉玄科因改命曰靈泉
之觀芝泥龍簡時修精禱之儀雲錦鳳羅歲度勤行之
士是知豐功盛業將厯運以有遷道捷玄關與虛元而
共久累朝寅奉五紀於茲素雲然氣以常霏白鶴青牛
而狎至國家朱光繼統綠字膺圖受白環於龜山得玄
珠於赤水雖三秦父老猶牽望幸之心而九服蒸黎重

觀開元之日信皇天之輔德諒百祿之咸宜道士武又
玄沖氣內充仙才外挺紀綱道任啟煥靈場薦享惟嚴
羽儀若舊琳房浴殿如清蹕之時巡絳節珠旂想舟輿
之下降幢幢御路奕奕宮牆或乘輶建節之賓或觀藝
探書之客陟瑤壇而增肅瞻玉座以長懷蓋仁風之所
被者深故遺德之所加者遠是宜播為雅頌告於神明
敢摛紫素之文恭鏤苔華之玉其詞曰

天地之氣宣以名山陰陽之英融為溫泉聖人用之益

壽延年同出於道同謂之玄逝矣伊唐蒸哉六葉河圖
帝錄鴻勳大業天秩孔明真符屢接雲蓋華亭芝房熠
熠歸功聖祖建此閼宮周原繚野反宇凌空孝思不匱
道德惟公希夷有象盱嚮宜通數有推移世分今昔屹
爾雲構依然聖迹藹藹修林湯湯神液備物莊嚴百祥
繁錫至哉坎德效此坤珍配靈上藥薦祉真人冥升自
遠遺烈長新思玄之老頌德之臣寘懷靡所用勒貞珉

洪州延慶寺碑銘

若夫名區勝境真靈之所徘徊通都大邑游居之所走
望故其府朝之制度里閭之延袤宮廟壇墀之肅裡祀
薦享之嚴無不及焉必可觀也豫章古郡通楚要津萬
靈所宗百寶攸集龍劍之氣炳耀於列星金冶之精騰
光於峻岳飛錦帷於仙館植鐵柱於重陰方志所傳奇
蹤可見而故老復言晉元帝即位之歲郡人有耕於東
湖之艮隅者獲塙像焉其高三尺其狀殊異守臣上啟
詔立寺以處之歲紀遞更薦奉無絕至唐太和三年文

宗皇帝以夢寐通感特詔修崇有僧普願者率勵衆力
創造飛閣極高明之制盡臨觀之室瞻仰之徒勝賞仍
在會昌汰沙旋更殄夷時有寺主僧神確躬奉瑞容瘞
於堂下大中改制將復修完像堙沈既不可得而靈迹
所在羣心未忘咸通二年連帥嚴譔表請重建因紀誕
聖之節署為延慶之寺子來之力雲構如初廣明中巢
寇亂常羣盜蜂起三災所及寺復焚如光啟二年廉使
王師甫即其故基又加營繕自時厥後百載於茲市朝

屢更興廢不及名人上士增飾相因國家奄有靈區普
恢教法人識修心之真家懷祈福之誠此邦之人素多
尚信千里之地頻致豐穰戶有餘貲居多暇日監寺僧
智清勤行其道時省其庸推誠以化人節用以成務峻
其卑庠緝其傾頽改作正殿及廊廡共七間踈楹廣廈
雕甍藻稅瑣窓洞戶珠網金鋪蹇產鴻紛深沈煥爛厥
政脩矣能事畢矣觀其康莊旁達閭伍綺分西則崇山
隱天烟霞韜映乎其上前則平湖彌望魚鳥翔泳乎其

中雖復觀雉接連車馬回合蕭然人外自遠世紛信乎
棲息之場習靜之地也僧契緣攝贊其事不朽是圖伐
石為碑以文求我銘曰

至哉玄貺邈矣坤珍凝為異像以佑斯民靈心所格精
舍攸因其神或隱其迹寧淪廢興在運啟煥由人有美
清師勤行其道彼都人士服義承教率是衆力完斯廟
貌祕殿穹隆層軒窈窕勝事精嚴丹誠至到名山雄雄
大江溶溶五侯之國千里之封靈場隱軫道氣明融神

明所相有感必通刊名法字永播無窮



騎省集卷二十六

欽定四庫全書

集部

騎省集卷

二十七至
三十

詳校官司業臣納麟寶

檢討臣何思鈞覆勘

總校官進士臣朱

鈐

校對官學正臣周

銳

謄錄監生臣趙

金簡

欽定四庫全書

騎省集卷二十七

宋 徐鉉 撰

洪州西山翠巖廣化院故澄源禪師碑銘

聖人設教賢者學之有能極深研幾剖疑折滯不背本
以矯激不沿波而流宕世人宗仰時君褒異斯可以為
君子矣禪師名無殷姓吳氏閩連江人也昔泰伯獲讓
肇啟南藩至德所及流光百代子孫蕃衍吳越為多至

今為著姓焉累世隱德鄉曲推重道氣鍾粹而生禪師
幼異常童不染俗態年七歲從晉安雪峰真覺禪師出
家二十詣開元寺受度真覺之道見重於時禪師默識
微言盡得要旨而復博考往行幽尋勝迹江浙諸郡靡
不經游先達推稱後生請益結轍連袂虛往實歸禪師
以道貴沖用性復虛靜所止之處學徒甫千人輒復捨
去晚歲止廬陵之禾山其名益彰季唐先主召見之特
加禮遇俾居廣陵之祥光院嗣君踐阼優禮有加賜號

澄源禪師命移處豫章之上藍西山之翠巖院是皆郡
邑之勝槩高人之游集自非密行淳德不能鎮服羣情
我迭居之綽有餘裕雖身在巖谷而恩注帷宸存省問
遺使者相望享壽七十有七建隆元年春二月五日終
於翠巖院甘露被樹數日不晞皓鶴盤空三周而去門
弟子用西域之禮葬於院之巽隅封於其上恩旨褒飾
名其丘曰大醫道俗孺慕會其葬者萬數鉉也趨捨異
術聲塵致睽於時釋氏方盛師門互啟嘗侍嗣君宴語

從容上言曰古稱千里一賢猶比肩也今號長者十數無乃多乎嗣君深以為言因曰惟澄源禪師其殆庶乎無幾何以家門情禮請告至山會師已沒瞻仰遺像參述行事乃信名不虛得亦表君之知臣今來京都復興師弟子鑒琮相遇琮師志性端慤修習精勤肅奉成規博綜衆藝慈惠救物時人稱之明詔賜號慧覺大師錫以熟服朝恩洽於累世實教門之榮觀也於時禪師委順三十年矣琮也思廣銘頌庶永遺風以鉉當學舊

史見求直筆若夫褒善稱伐翰墨攸先載瞻西山實寄
松檟敢抽祕思以告九原其銘曰

允允東越武夷之區時生異人與古為徒禪師出焉俊
邁且都顯顯南楚西山作鎮真靈所宅教法斯振禪師
居之允矣令聞道無不在法非可名理超言象俗仰風
聲豐碑載勒勝氣長生猗嗟來者用此為程

大宋舒州龍門山乾明禪院碑銘

山岳極天莫雄於瀟霍川瀆紀地莫靈於江淮礪礪紫

帶中畫郡國幅員數千里舒皖居其陽真聖之所躔次
景福之所興作必有高士來闢妙門以導精粹之氣以
恢淳和之俗則龍門山乾明禪院所以建也是山東去
郡九十里蓋瀟岳之一峰山有龍井郡人雩禱之所靈
應昭哲因以名焉深巖洞岫風雲之所蓄泄湧泉清池
璿碧之所隱見涼飈爽氣五月可以披裘修竹茂林四
時未嘗易葉游方之士至輒忘歸有曉遵禪師者家本
宜春幼捐俗累從師訪道歷抵湘沅探幽洞微得聖人

之宗旨清心鍊行踵前作之風聲向道之徒靡不宗仰
乾德五載始來此山顧瞻林泉有懷棲息邑人宋仁瑗
輟其隴畝以奉宴居面壑臨流誅茅穿徑遠擬關令草
棲之觀近同焦光蝸牛之廬歲計有餘善言來應廬江
人侯霸大施資賄以奉經營數年之間蔚然崇構複廟
重屋瑣窓洞戶藻以丹雘駢以璧璫所以重威神也黻
堂講肆踈楹高坐皓壁月皎層軒霞舒所以敷道義也
前則端闥瞰野旁則修廊納階廚廩充牣屋室安閒閔

經籍於巖房息徒侶於奧寢棟宇延袤凡二百區蓋精誠之所憑實邑里之勝槩也今上嗣統像法大興禪師徒步神京對揚雲陛恩旨嘉賞賜號曰乾明禪院華題鳳篆降自慶霄聖日天光煥乎幽谷夫道之行也時與地并斯郡山水奇絕動植茂遂民情淳朴聖迹回環非明主至仁不能恢清淨之教非禪師密行不能化畏壘之民示之以精修祐之以戢穀變魯至道夫何遠哉鉉頃歲謫居此地思過三載閭里之見待也厚風物之恆

志也深冥得喪之懷無憔悴之色及今三紀未嘗忘諸
會禪師狀肇興之由圖不朽之作受簡秉筆欣然紀焉
銘曰

教必有象待時而行道無不在因地而靈滯岳穹崇皖
川清泠鬱鬱佳氣宜為福庭有美遵師為人由己人應
物感風行艮止闡此崇薄化為金地雲構中開靈光四
起君恩啟煥真聖回翔劉雷永遠接軫齊芳玄符靡測
福應無方刊茲樂石用配無疆

大宋故天雄軍節度行軍司馬易府君神道碑序

府君諱文寶字廣美豫章高安人也在昔有晉舂陵令
雖位不充盡忠以亡身祚流子孫繁衍荆楚其世祿種
德則故老家牒詳焉曾祖暇祖崇皆不仕妣鄒氏追封
范陽縣太君從子貴也君符彩奕邁質性深沈少時遭
有吳功臣劉公信節制豫章訓兵選士聞君名而召之
君謂所親曰大丈夫當立功立事以大家門吾聞劉公
剛毅侔儻有英雄之量必能申吾用也乃杖策從之甚

見器重委以禦侮授之親兵出為爪牙入參侍直外捍
封略中清寇攘十年之間遂升右職劉公物故唐室中
興君於是策名周行入典離衛於時戎事甫定國容載
穆君止於拊循士衆恭守官常時其寒燠均其勞逸勤
勞微道庶察何留不矜出位之思甚得為將之體自天
威軍裨將累遷至左右天威軍都虞候自檢校右常侍
至檢校太保及淮甸倣優都邑震驚以君為雄州刺史
充建武軍使其理所即廣陵之天長縣也據衝要之地

有士民之衆綏懷訓練其俗用和會周世宗親總六師志平江右於是濠泗攜叛揚楚摧陷君城小援絕堅守累旬世宗使降將郭廷謂臨城招諭君曰棄命以苟生不義勦民以全名不仁吾處中道而已乃間道表於本朝脩陳形勢且論遠慮還旨嘉納諭以割地之謀君即開城請罪世宗慰勞數四錫賚加等即授衡州刺史封太原縣子充天雄軍節度行軍司馬皇宋啟運優獎有加改道州刺史進爵為侯君以及絳老之年有卻克之

疾表求致仕優詔不許勤懇固請聽歸臨淮郡私第春秋七十有五開寶元年秋七月考終命三年九月葬於盱眙縣義和鄉西嵩里北團山禮也夫人會稽縣君謝氏亦江左之冠族作合君子克昭令儀箴管之勤風彰於婦德湯沐之邑晚從於夫貴訓導諸子備全義方鍾蓬首之痛哀而知禮受高堂之養嚴而有慈春秋七十有六太平興國二年七月終於臨淮私第某年月日合祔焉禮也有子五人曰延貴延祚延壽延義並克荷先

業勤修令名或參藩郡或幹內職皆先夫人而沒唯第
四子延慶獨稟粹和服膺儒教孝悌之至稱於州閭承
顏先意侔曾閔之行居喪過哀有二連之風廬墓絕漿
義感生植嘉木連理玉芝成葉遠近聞之莫不驚嘆由
是自前臨淮令拜大理丞及夫人卜葬違制臨赴為有
司所劾有詔勿問聽解秩家居惟府君之生也臨戎以
恩信理民以慈惠事君全其節處身由其道故垂此家
法推為慶門是生孝子以永世祀美矣哉鉉聞風而悅

之故勒於神道其辭曰

於惟易氏忠義之門德厚流光顯於後昆後昆之賢生
我府君體道自居壯圖不羣輟耕永歎負羽從軍赴赴
和門勇節斯設靜則嚴重動則奮發臨難忘私處危全
節名遂身泰考終無闕芄芄泗州永閔佳城哀哀孝子
載感坤靈君恩賁寵樂石刊銘百代之下常流淑聲

故唐大理司直鄂州漢陽令贈衛尉少卿樊君神

道碑

公諱潛字仲明京兆萬年人也昔者虞仲垂孫謀之慶
肇啟我封山甫昭補職之勤實大吾族或則游聖門而
稱達者或則冠仙籍而號真人豐沛功臣經營於大業
南陽外戚佐佑於中興傳祀百世流光萬國而我之占
籍世茂西京樊川之居抗衡韋杜曾祖澄以七世同襲
孝德升聞大中制恩特加旌表戕戕石闕至今存焉祖
偁濮州司戶參軍考諭光化中補池州至德令時天下
已亂因家池陽終潤州金壇令公中和稟粹形器夙成

好學之勤本由天賦至孝之性不墜家聲始及弱冠併
違怙恃絕漿泣血哀感州閭負土成墳終喪廬墓言子
道者以為美談於時唐祚淪胥宗室稱制江淮之地不
失舊章公以射策高等補潤州丹陽尉試吏之課書考
為優廬陵之民古稱多訟加以畝籍違制亂獄滋豐守
臣上言求拯其弊有命擇堪其事者聞公之能因而命
之公既至乃相五土之沃瘠察人家之衆寡采古之制
酌今之宜創為新規衆皆悅服而復出械繫之囚窮兩

造之辭雪當死者數十人使還議賞增秩進等遷壽州
壽春縣主簿既而廬陵之政日理南楚之人皆觀久之
以公為光州光山縣令加大理評事猶以前效也於時
南北分裂縣臨敵境有爭桑之女多探丸之吏比閭之
衆罕嘗寧居公於是糾集義勇扼守要害推以恩信濟
之強明三載之中一邑用乂遷池州石埭令縣有大姓
侵撓細民歲比不登俗乃重困公繩之以法董之以威
豪石震悚相與逃匿於是啟請出官粟以賑乏絕省力

役以濟農功慈撫仁薰視之如子歲豐俗阜政用大成
就加大理司直旌能政也秩滿遷鄂州漢陽令未幾遇
疾壬子歲某月日終於縣之正寢享年五十有七以丙
辰歲某月日葬於池州貴池縣永泰鄉保靜里之原禮
也夫人王氏鴻臚卿滔之女軒冕之族閨房之秀室家
垂訓惠問風行長子若訥不事王侯自全高尚次子知
古才藝畢給際會昌朝踐歷臺省交修繁劇今為右諫
議大夫河北轉運使揚名之業方茂顯親之數遂優公

累贈秘書丞戶部員外郎衛尉少卿夫人封瑯琊縣太
君惟公生而岐嶷長而學問窮九經之奧旨綜百氏之
微言率是古道施於為政行之以直守之以廉事親以
孝飭躬以禮士元之器命屈於生前臧孫之忠慶貽於
身後君恩飾壤世祿傳家咸京之舊表未堙秋浦之豐
碑復立俗有遺愛吾無愧辭其銘曰

南山崇樊川溶溶翦商之烈補衮之功百代之後流
光不窮爰有孝德克誕我公猗歟我公顯允君子投此

利刃行於百里有惠於民何必貴仕垂慶於後何必在
已慶霄之澤自葉流根歿垂中佃生駕魚軒二子殊志
俱大在門僂僂愚谷英英諫垣九峯之下貴池之口覆
斧馬鬣金雞玉狗民即桐鄉碑如峴首江水長流今名
同久

洪州豐城縣李司空廟碑文

先王之制以勞定國以死勤事皆得祀之然則非適幽
洞靈之士有驚愚顯俗之迹亦不能臻此也李君諱承

屬字大用其先隴西人中葉因官遂家上黨先君諱神
福避亂擇主來適維揚於時唐室崩離諸侯角逐吳武
王奮桓文之舉我先君效開張之用摧兗略地所向無
前功加於時慶鍾於後終淮南節度副使鄂郡招討使
君即招討長子也幼而爽俊長而雄勇年始志學即從
義旗善撫士卒生知韜略厲若鷹隼疾如風電時稱虎
子敵畏馬兒以功累檢校左右僕射為橫衝裨將天祐
丙寅歲從招討使秦裴平豫章叙功為最新附之地屬

郡未賓明年命君領偏師平餘盜戈船先進羣帥後期
山越霧集漢矢且盡同玄冥之沒若桂蠹之沈享年二
十有三諸將嗣事通穢克清迎君之喪寔於洪州豐城
縣揚子洲惟君夙齡挺秀盡忠死節識與不識雜然推
奇而英靈胥饗若在左右如鄭人之驚伯有類吳俗之
畏子文於是耆艾相率啟求立祠於墓側公議僉允因
贈司空水旱禱祈無不即應州境頻歲豐穰湍瀨無虞
疾癘不作鄉祚而君之家門亦康寧蕃衍焉及今七十

年矣雖神道恍惚不可備論而忠誠報應良足為勸猶恐年世綿邈流俗失傳或見據於越巫將受譏於淫祀嫡孫仁昭願以事實勒於貞珉鉉素與君諸子游復連姻戚披文相質所不獲辭初君之長弟諱承鼎為吳王之愛壻故國人咸謂君為伯氏而忘其官稱焉今用明白之銘曰

嗚呼李君勇且有仁生殉國難沒為明神南楚之郊章江之濱祠堂奕奕像設僉僉薦信以時降祐於民龍泉

太阿校靈比珍衝斗之氣終天不淪

洪州道正倪君碣

君諱少通字子明其先千乘人也末葉避地徙居巴陵
灌洞庭之餘波襲九嶷之秀氣儒風繼世貞節自持垂
慶炳靈先才是出君風骨秀整襟懷坦夷幼挺高情即
依道捷弱冠遐舉來游九江悅廬阜之名區得董君之
故址種杏之地榛莽森如慨然永懷誓復靈構誅茅築
室練行修身闇然而彰千里斯應於時唐運告謝宋宗

代興江左被玄元之風二葉恢清淨之教君以清心苦
節升聞於朝癸丑歲賜錢三百萬卽所居建太一之觀
於是疏鑿舊址草創新規悅以子來成之勿亟十有餘
歲清宮煥然凡建四殿五堂重門兩序內外棟宇總百
三十區像設儀衛莫不稱是力闢汙萊為良田者五百
畝而飯賢之費有餘手植杉松成茂林者千餘根而甘
露之祥再降由是牧守嘉尚道俗依歸為本州道正乃
知太乙觀事享壽九十有一體力康壯淳化元年秋八

月八日子時怡然而化容貌如生初君自擇葬地於蓮
花峯下即以二年春正月窆焉君性質沖淡不耀其光
表率教門正身而已喜賦詠善鼓琴龍鳳之形皆由手
製山水之操自洽天和所居之觀俯邇城郭登山之客
必先造焉君將迎接待高卑如一絕迹市朝成樂林泉
六十餘年慎終如始門人弟子先以慈孝為訓有若李
延照蔣守龍等近四十餘人皆以孝行為時所稱親弟
德規同學弟謝又能等叶力同心共復靈迹並先早世

今謝君弟子王省昂嗣膺道任師孫錢知素繼知太乙
觀事師門之盛論者美之鉉頃歲扈從南巡與師款接
旬日傾蓋之分有如素交錢君以論譔見求不當為讓
其銘曰

太乙董君上帝之賓遺方眇邈奮迹荆榛倪師慷慨復
來清慶種杏之地林光再新異世神交豈其後身冥升
自遠代劍非淪瞻言華表誰見千春刊盟翠琰道契攸
親

騎省集卷二十七

欽定四庫全書

騎省集卷二十八

宋 徐鉉 撰

泗州重修文宣王廟記

昔我先聖有周公之才無文王之時故憲章其道以垂萬世精神冥契夕則夢之是知千載旦暮蓋其道同也自時以降鴻儒碩生敷暢微言佐佑大化專一之志通於神明咸夢宣尼以著名實斯文間作來者不誣國家

彰灼神功在宥天下禮樂刑政舉百王之中典謨訓誥
用三代之式文學之士靡然向風臨淮徐君名某字某
弱而好學壯而有立行敦乎族黨名聞於州閭修辭立
誠躬儒者之業博施濟衆秉義士之規隨計春官再不
中選會長子宗孟郡亦舉秀才君以為名不可多取即
欲退而求志無何夢游淮上條有淪胥之厄衆君子拯
之而置於宣聖之堂儼然逢掖之容若奉緇帷之會悟
而神聳益用兢懷聞者竒之勉以西上明年春冕旒臨

御親較羣才崇朝之間父子俱捷蓋古今未之有也君
歎曰天子廣登進之路杜請謁之門先聖知之是有敦
勉斯實至德感兆鄙何有焉思欲昭答靈心正顯玄貺
惟茲泗上雄視百城學校之制義在不後王業伊始天
下初平舟車輻輳之都郵傳旁午之地邦君丞掾日不
暇給絃誦之所窺戶聞然君白於府君願補闕政於是
出家積鳩國工即舊謀新瞻星揆日乃建路寢乃立應
門闢講論之堂設東西之序廣衮合度奢儉中規像設

增嚴繪素加煥凡祭器制度皆圖於垣墉俾夫觀藝之徒橫經之侶居今識古虛往實歸三代之風由斯而致也錄事參軍張君濟綱紀之任夙夜惟寅嘗與同僚及斯而歎曰振舉廢闕公力未遑倘屬於好事君子非徐公不能也及茲締構如宿契焉是知善人之言罔弗響答夫聖人之教也與天地常在將陰陽並運恍惚玄應昧者不知今徐君服之而成大名感之而臻介福咨爾後學可不勉歟金石之銘其無愧已於時歲次乙酉雍

熙二年秋七月記

邢州紫極宮老君殿記

昔者老君伯陽憫大道之既隱傷周室之既微以為清
淨無為道之本也非建言不能盡其意安上治民道之
用也非設教不能永其成乃著書於函關以明清心之
要授禮於仲尼以開垂世之統由是教義之被於民如
造化之漸於物賢者識其大不賢者識其小出入戰國
經歷薄俗君君臣臣父父子民到於今受其賜則二

聖人是賴焉故並享明祀格於寓縣雖百世不能易也
邢州紫極宮者唐開元中所立老君像則琢玉石以爲
之真靈所憑功用殊絕眸容奇表儼然若存瞻仰之徒
莫不增肅王室剝亂郡國崩離三晉之郊戎馬孔棘崇
堂隳落乃移像於北極殿之西偏數十年之間不絕如
綫皇宋膺運百度惟貞道風載陽真侶咸萃女道士陳
休元江左右族夙珮玄符不隨象服之華自結鳳羅之
誓勤行匪懈真氣日滋乙亥歲伯氏從宦將之俱至畏

壘知化汗漫與斯郡守賢之授以官任亦既蒞止慨然
永懷嗟崇構之傾頽歎尊位之蹂雜程功度費即舊謀
新知州事段公思恭仙派分源諫垣舊德嘉其偉志助
以俸金郡僚而下歡然風靡即宮之西序建老君殿三
間材用必良工藝必精廣袤中規奢儉合度旭景升而
丹彩煥清風襲而爽氣生肅然仙都復覩靈境粵某年
月奉玉像而處焉霓衣致虔羽蓋成列几筵嚴肅香燭
苾芬鐘磬咸和煙雲改色非至誠感召孰能臻此者乎

鍊師之家奕葉從公清白垂訓仲兄前鹿邑令省躬秉
直忤俗退而貞居季兄邢州書記長參學古入官和以
接物積善之報宜生仙才鉉知二君歲久故美其事而
紀於石某年十二月二日記

洪州華山胡氏書堂記

士君子承積善之慶服聖人之道治身修心義之本也
風行於家德之充也教被於俗人之周也疇克具舉吾
其興之豫章屬邑世云舊里山水特秀英靈所躔安定

胡君籍於是君名仲堯字光輔奕葉儒學蟬聯簪紱曾
門標舉煥列宿之華祖德韜映戢少微之耀至於我先
人少好左氏春秋之學研幾索隱儒者宗焉及君之長
克揚其業言斯出矣身則踐之揖讓周旋之儀孝友嫻
睦之行修乎閨門之內形於羣從之間少長有禮絲麻
同繫鄉黨率義人無間然君以為上古之風可以馴致
由六經之旨可以化成也乃即別墅華林山陽玄秀峯
下構書堂焉築室百區聚書五千卷子弟及遠方之士

從學者數千人歲時討論講習無絕又以為學者常存
神閒曠之地游目清虛之境然後粹和內充道德來應
於是列植松竹間以葩華涌泉清池環流於其間虛亭
茵閣鼎峙於其上處者無斃游者忘歸蘭亭石室不能
加也又按圖牒云昔陶丘公李八百皆脩道於此是知
人境相得其道乃光勤而行之古猶今也鉉欽羨其事
道阻且躋故述斯文以垂不朽年月日記

洪州新建尚書白公祠堂記

大丈夫處厚居實據德依仁豈徒潔身將以濟世故著
於事業發於文詞而後功績宣焉聲名立焉蓋有其實
者必有其名是以君子恥沒世而名不聞也若乃格於
穹壤漸於蠻夷大則藏於金匱石室之書細則誦於婦
女稚孺之口則古今已來彰灼悠久未有如白樂天者
不其異乎故神明相之攸居不傾黎甿懷之餘風不泯
士大夫神交道親若旦暮焉尋陽古郡昔君謫宦之所
綿祀二百市朝屢變而司馬聽事之室歸然獨存斯益

異矣聖運光啟崇古尚文三代之風傳遠萬里禮部郎
中江南轉運使張去華述職按部聿來是邦弭節城闔
攝齊堂奧以為先賢所舍邑里具瞻與夫元規之樓惠
遠之社崇飾祇薦我何後焉太子中允知州事梁君翊
贊善大夫通判州事羅君或皆叶規同心相視莫逆政
有餘裕府多羨財即舊謀新創為祠宇傳寫廬山之遺
像寘於北墉棟宇深嚴門序奧肅然廟貌想見其人
凡游居之徒仰高山聆遺韻薦誠觀藝結轍於斯禮不

云乎禱祀古之卿士有益於人者觀樂天之文主諷刺
垂教化窮理本達物情後之學者服膺研精則去聖何
遠其為益也不亦多乎尸而祝之固其宜矣某昔游廬
岳獲拜儀形今居騎省遙聞締構喜儒宗之不墜嘉使
者之得人故作斯文勒於貞石年月日記

洪州始豐山興玄觀記

聖人之言道無不在若乃域中歸其大萬物恃之生鴻
化玄造無德而稱已至於顯神道之教挺方外之衛反

之於身以固其本清心鍊氣保精畜神餐霞茹芝修用
者殊軌御風乘景游集者無方蓋真階仙品之有差故
洞天福地而區別奇篇所紀靈境可尋豫章始豐山者
案圖牒第三十七之福地也爾其穹窿蹇產干霄蔽日
凌空瞰野之勢嶽峯窈窕蒸雲池雨儲神宅怪之奇陰
林修幹材用之所生也周飛湍激流利澤之所及者遠
紫烟白霧隱映而紛霏靈風爽氣蕭寥而披靡醺享之
數歷代相因爰有興玄之觀是為薦誠之地土德云季

三災遽興市朝貿遷堂構隳頓幾歎遼城之鶴常栖楚
幕之烏若夫真氣所憑神靈攸相物無終否道不遠人
道士聶紫庭襲玉笥之地英追九仙之夙契以勤行為
志業以倣古為師資歲在玄扈來游此觀顧瞻祠宇慷
慨傷懷徒侶敦請遂膺其任積行所應至誠易通游居
之人莫不信奉以為興作者古人之所慎因循者前哲
之所宗足備制度何必侈大於是補其闕而葺其壞窒
其隙而扶其傾集瓴甌塹垣之工加巧塤丹雘之飾瑣

窓鏤檻朱戶金鋪沈深靡迤虛明藻麗百年舊制一旦
維新日就厥功十稔而已已不病於費人不知其勞用
此修真真其焉往又以方志漏略碑頌堙沈使夫來者
何所宗仰謂余為好道者故求我以文是用直書以觀
成績淳化元年夏六月記

金陵寂樂塔院故玄寂禪師影堂記

士有切問強記以修其內和光退節以晦其外而人自
仰之名自歸之不知所以然而然見之於玄寂禪師矣

師名澄圮姓陳氏番禺人既生而孤天骨奇秀岐嶷之態有異常童端居靜念如學道者七歲復失所恃母臨終以紀其始曰此兒幼有奇應法當出家倘果斯願吾無恨矣年十一歲遂詣本郡從師十七歲韶州南華寺正度於是造詣先達請益質疑歷游名山無遠弗届不違類於顏子起子同於卜商丁未歲來止舒州山谷寺徧閱經論師門之學無所不遵然未嘗為人言也是時季唐二葉像法大興凡聚徒講學者所在奉之以為長

老禪師徇狎鷗之志慕爭席之風雖衆人與居而羣望
自集道俗敦請抗志不從郡守周公因人之心封章上
啟嗣君嘉賞以詔書命之周公延至郡齋親為致禮師
不得已乃攝齋即坐音詞爽朗察吏屬目士庶咸歡還
處精廬燕居如故丁巳歲避難南渡止於廬山嗣君召
致建康累徵乃至遍處名寺咸敷講席恩禮優渥賜號
玄寂禪師時之名流無不景仰至於誘進後學開導真
詮激厲憤悱皆得所欲乾德五年冬十一月終於建康

龍光禪院春秋六十有一後主遣中使護葬贈送甚優
葬於都城東南隅鳳臺鄉門人弟子廬於墓次誅茅構
宇遂成道場儼然靈儀式觀遺愛鉉頃自禁掖放逐舒
庸閉關却掃不豫人事時游瀟岳因獲觀止容貌閒暇
議論平淡言意相得有若舊交雖慙方外之期自叶忘
形之契一生一死已隔於當年谷變陵遷復悲於陳迹
弟子嗣昭等永懷遺範願勒貞珉因述斯文庶申風分
某年月日記

撫州永安禪院記

教之大者其行遠利之博者其報豐自三代已還百家
並騖炎靈之後釋氏特隆經法之盛參乎先聖祠宇之
設廣於虞庠不知所以然而然非言像所及已撫州郡
署之左里而近有禪院焉乾符中署曰寶國天祐中改
名永安方志失傳莫知肇興之始高人遽處咸為燕坐
之場夫經像之所居必馨之所薦必將據郡國之形勝
襲川原之氣像斯郡也總楚越之都會斯院也浸章汝

之清流逸少康樂江左名士而墨池經臺介乎比閭麻姑南真丹臺上列而僊壇閒館峙乎封域閑閑相望鐘磬交音神靈之所依憑烟霞之所韜映爾其棟宇之狀也則赫赫乎顯敞眈眈乎深嚴黼藻成文磨龍盡妙層樓對峙修廊四通列講肆於崇堂安衆士於奧室動有擊蒙之益靜有寧體之娛儲峙必豐器用必給四方學者至輒如歸考績程功則住持禪師義韜之力也韜公道學精詣慧心明悟以濟衆為務以興教為懷少游名

都歷訪先達晚棲臨汝自關師門甲申歲詣京華褐衣
請見對揚玉宸躬奉天言論難所及辭義響答聖恩加
賜賜以紫衣登門之徒莫不增肅韜公以斯院制度崇
麗修奉精嚴金石闕如何以示後惠然見顧求我以文
辭讓不獲因為之記年月日記

潤州甘露寺新建舍利塔記

維皇宋二葉改元五祀潤州丹徒縣令王記改築縣墻
掘地得石玉驗其刻文梁大同五年道人法序瘞真身

舍利於此函中銅龕一龕中銀盒一盒中銀瓶二舍利
七粒存焉而銅龕復有刻文則唐貞觀十二年再加營
奉掌役者張遇獲之以獻遇也感真應之在已念妙道
之可修因投郡之慈雲寺削髮為沙門易名閨精心苦
行誓復前迹廣募衆施疇咨協心數年之間克果其願
即以端拱元年夏四月八日遷致於郡之甘露寺東隅
建浮屠焉獻狀而來求志其蹟粵聖人在上欽若靈心
政無不修神靡不舉玄貺交感坤元效珍用能使幽瘞

之質煥然景彰騫崩之迹蔚然雲構然則澤及微隱福被含生其可知也是郡也揚州之都會京口之重鎮六代之風流人物綜萃於斯三吳之山川林泉肇發於此高深自改氣象常存是寺也北固山之陰崖贊皇公之遺迹崢嶸飛閣迴闌滄江邈迤巖房周行數里浮屠之作遠邇雲臻故真師因人之心相地之勝獲此空隙建茲崇封材用工役必求善良規模制度必據經法其高七十尺其周二十步八隅瑩玉五蓋凌霄冠星珠於觚稜

旭日先照圖雲氣於棼橑宿霧常棲中巖睥容肅然月
滿旁績靈變煥若霞舒游居之徒莫不稱歎愚嘗見釋
氏子為此役者多矣如真師者其涉道也深其居處也
卑上無許史之託下無倚陶之助苦節以感物績微而
著功不恩民不愆素而能事以立亦可尚也故嘉而志
之端拱二年二月一日記

重建宓子賤碑陰記

單父縣宓子賤舊碑賈至文梁耿書天寶十年四月四

日柳載建始致於故縣北隅琴堂之上光化二年以縣
為郡署縣令李知傑移理於今所碑亦隨徙措置不謹
風雨所摧因折為數段扶置垣墻之間及今八十年矣
皇宋撫運書軌大同人文化成清和咸理縣令毛君名
庶幾越自江左來撫斯民見賢思齊好古博雅以為宓
子之化人猶不忘賈公之文世共稱賞若棄之而不脩非
所以訓民事神也於是再建隆碣重書舊詞以鉉嘗學
篆籀見求運筆梁氏之迹本自非工仍為倒薤之勢非

八書之正也而又字體譌俗文詞舛誤今以賈氏集校而正之遠擬秦李斯改為玉筋立於宓君之祠庭事之宜也以改作之意附於碑陰云太平興國五年正月二十日記

邠州定平縣傳燈禪院記

乾維巨屏實曰邠郊其地險固其氣剛健被宗周信厚之澤詠王業艱難之風是故人知徼福之方俗嚴慈氏之教精廬靜宇隱輶相望定平縣傳燈禪院者帶位署

之左方據郭邑之勝勢四面環其趾煙水盪其胸却倚
崇岡爰標龍尾之號上瀉寒澗仍有天河之稱藹爾鮮
原鬱然佳氣昔居唐室之季四海崩離中和四年有禪
師從一者挺秀宗門從師臨海避難高舉擇地遐征萬
里而來稅駕於此相其爽塏有志盤桓羣心翕然助成
其事賈地築室者咸集橫經踰履者亦臻十年之間百
堵斯建守官嘉尚請命於朝景福二年詔賜題署天光
所及道譽彌高一公化去弟子佐範克嗣其業範之弟

子知信復繼其任守之以恪加之以勤感召益多法事
增廣殿堂像設靡不莊嚴儲侍器用無乏供億而經典
猶闕講誦弗聞以為居今識古者存乎書觀象得意者
存乎言金匱石室之宏規名山京師之故事此而不務
何以為能乾德四年秋肇啟精誠指期繕寫邑人石遷
等聞風而悅叶比其謀日就月將惟力是視卷以緗帙
貯之琅函邑人高玘奉其家山以脩構室采伐之用夫
役未充俄而暴雨猥至山溜奔激屹然巨石自至院前

取以給用宛契心匠雖廬岳神道之殿石頭後渚之梁
感通其符無以過也既而信公復沒以屬弟子令熙熙
也遵行弗敢失墜而民非兆萬俗空猗陶漸以化之靜
以俟之二十許年猶未訖事會中使王君名素分權筦
之職督閩梁之征歸餘於終率醵衆力於是簡牘几閣
即日僦工俾下帷鑿壁者得肆其勤研精索隱者不愆
其義貞風無泯介福來臻繫高士四世之勤垂本宗百
代之憲宜其篆刻金石永示方來知余有好善之心專

舊史之學求我是用直書於時歲次壬辰淳化三年春

三月記

騎省集卷二十八

欽定四庫全書

騎省集卷二十九

宋 徐鉉 撰

大宋左千牛衛上將軍追封吳王隴西公墓志銘

并序

盛德百世善繼者所以主其祀聖人無外善守者不能
固其存蓋運厯之所推亦古今之一貫其有享蕃錫之
寵保克終之美殊恩飾壤懿範流光傳之金石斯不誣

笑王諱煜字重光隴西人也昔庭堅贊九德伯陽恢至
道皇天眷祐錫祚於唐祖宗神武世有顯德載祀三百
龜玉淪胥宗子維城蕃衍萬國江淮之地獨奉長安故
我顯祖用膺推戴淳耀之烈載光舊美二世承基克廣
其業皇宋將啟玄貺冥待有周開先太祖歷試威德所
及寰宇將同故我舊邦祇畏天命貶大號以稟朔獻地
圖以請吏故得義動元后風行域中恩禮有加綏懷不
世魯用天王之禮自越常鉤鄴存紀侯之國魯何足貴

王以世嫡嗣服以古道馭民欽若彞倫率循先志奉烝
嘗恭色養必以孝賓大臣事耆老必以禮居處服御必
以節言動施舍必以時至於荷全濟之功謹藩國之度
勤修九貢府無虛月祇奉百役知無不為十五年間天
眷彌渥然而果於自信怠於周防西鄰起釁南箕構禍
投杼致慈親之惑乞火無里婦之辭始勞因壘之師終
後塗山之會太祖至仁之舉大賚為懷錄勤王之前効
恢焚諉之廣度位以上將爵為通侯待遇如初寵錫斯

厚今上宣猷大麓敷惠萬方每侍論思常存開釋及飛
天在運麗澤推恩擢進上公之封仍加掌武之秩侍從
親禮勉諭優容方將度越等曩登崇名數嗚呼閔川無
捨景命不融太平興國三年秋七月八日遘疾薨於京
師里之第享年四十有二皇上撫几興悼投爪軫悲痛
生之不逮俾沒而加飾特詔輟朝三日贈太師追封吳
王命中使莅葬凡喪祭所須皆從官給即其年冬十月
日葬於河南府某縣某鄉某里禮也夫人鄭國夫人周

氏勲舊之族是生邦媛肅雍之美流詠國風才實女師
言成閭則子左千牛大將軍某襟神俊茂識度淹通孝
悌自表於天資才略靡由於師訓日出之學未易可量
惟王天骨秀異神氣清精言動有則容止可觀精究六
經旁綜百氏常以周孔之道不可暫離經國化民發號
施令造次於是始終不渝酷好文辭多所述作一游一
豫心以頌宣載笑載言不忘經義洞曉音律精別雅鄭
窮先王制作之意審風俗淳薄之原為文論之以續樂

記所著文集三十卷雜說百篇味其文知其道矣於弧矢之善筆札之工天縱多能必造精絕本以惻隱之性仍好竺乾之教草木不殺禽魚咸遂賞人之善常若不及掩人之過惟恐其聞以至法不勝姦威不克愛以厭兵之俗當用武之世孔明罕應變之畧不成近功偃王躬仁義之行終於亡國道有所在復何媿歟嗚呼哀哉二室南峙三川東注瞻上陽之宮闕望北邙之靈樹旁寂寂兮迴野下冥冥兮長暮寄不朽於金石庶有傳於

竹素其銘曰

天鑒九德錫我唐祚綿綿瓜瓞茫茫商土裔孫有慶萬
物重覩開國承疆距吳跨楚喪亂孔棘我恤疇依聖人
既作我知所歸終日靡俟先天不違惟藩惟輔永言固
之道或汙隆時有險易蠅止於棘虎游於市明明大君
寬仁以濟嘉爾前哲釋茲後至亦覲亦見乃侯乃公沐
浴玄澤徊翔景風如松之茂如山之崇奈何不淑運極
化窮舊國䟽封新阡啟室人諗之謀卜云其吉龍章驥

德蘭言玉質邈爾何往此焉終畢儼青蓋兮袞袞驅素
虬兮遲遲即隧路兮徒返望君門兮永辭庶九原之可
作與緱嶺兮相期垂斯文於億載將樂石兮無虧

大宋右千牛衛上將軍隴西郡公李公墓志銘

公諱從善字子師隴西成紀人唐室之諸孫元和之近
屬譜牒詳悉此不具陳若夫天祚之德大運有時而極
積慶之祀百世無得而踈必生克肖之賢以承有後之
應保姓受氏公實宜之昔者土德既微羣雄角立維我

顯祖奄宅舊吳延祚四紀傳國三世公以天屬之愛膺
寶玉之封始在膠庠已有名望姿儀秀出文學生知仁
孝極於事君謙抑形於下士中外之論翕然稱之由是
受任六官交修庶職彌綸舊典諮訪老成恪居無違所
至皆理於時聖人出於中土正朔及於四方維我先君
祇畏天命受盟請吏息民弭兵玉帛交馳冠蓋相望公
親則介弟位則中台獨奉絲綸留參槐棘元戎駟牡分
建節之權玄冕九章奉侍祠之列朝獎既厚臣誠益恭

後凋之葉無渝萬頃之陂自若故得全名節於危疑之際保恩顧於終始之間環衛迭遷寄仕增重盤根必解師律以貞十有餘年其志如一嗚呼修塗方騁景命不融春秋四十有八雍熙四年九月九日薨於通許護軍之廨詔輟朝一日賻絹百匹即其年冬十月十三日葬於開封府開封縣吹臺鄉蘇里祔太夫人凌氏之塋禮也前夫人徐氏繼室周氏並早卒皆有肅雍之德窈窕之華宜家治內盡其規魚軒象服昭其盛子十四人仲顗

仲翔仲衍仲華仲雅仲隸仲寧仲簡仲彬仲文仲猷仲
玄仲義仲端女十四人慕英懿卿奉蘋蘊簡正容茂節
穉仙惠昭如賓道崇鳳兆幼貞閨秀季真或嬪於盛族
或待禮未行惟公生於深宮特稟異氣謙而得禮和而
執中容納直言賓延素士經歷夷險雅度不渝大年永
登終古同難鉉登門斯久辱顧殊深永惟知己之恩願
表為陵之谷其銘曰

真源引派仙李垂芳實生我公金玉其相非禮勿動出

言有章忠信以濟終然先臧三代之姓倭焉為庶九萬
之程湍然中路吹臺北峙浚川東注不植刺草長瞻率
樹大雅君子隴西公墓

大宋故處士贈太子少師李公墓志銘

并序

道之泰也賢人振衣而濟物時之否也君子括囊以獨
善其有修之家而孚教於俗無其位而博施於人角立
傑出蓋亦難矣公諱某字某庭堅邁德百世流光源長
派遠蕃衍郡國今為常山真定人也祖某贈太子少保

考某贈太子少傅公即少傅第三子也幼而岐嶷長而
純孝承顏先意實稟生知七歲丁太夫人之憂泣血絕
漿殆於毀滅宗族驚異謂之神童事兄弟人莫能間先
是唐之叔世燕趙多虞故我先人累世貞遯公亦奉家
法咸樂丘園躬稼敦本儉以足用百年之業是享素封
既而天下兵興生民益否公盡出私積以均有無為食以
救饑歎微嗟來之誚焚券以贈乏絕非市義之求遠邇
之人全濟甚衆懷仁向義者撫之既無矜色背惠棄信

者接之亦無愠容襟懷曠然莫窺其際慈愛惻隱視人如傷昆蟲草木無所大闕故閭里率化風俗以和崇儒遵道墳籍未嘗釋手喜酒好客醒醉必與之同常以爲芳華易凋光陰不駐發於吟咏以寄其情藜杖角巾所至皆適是非擾擾若蚊蚋之過前愚智憧憧若螺贏之在側至矣哉古之達者也開運末有晉失御獫狁孔棘公挈家南渡居於胙城伯氏飛龍府君時在滎陽召公同處廣順三年夏六月日終於鄭州私第享年四十有

三夫人清和郡太夫人張氏以謝女之淑德徇萊妻之
高節宜家理內令問藹然威姑性嚴諸婦皆聳夫人順
而得禮勤而無怨晨夕參侍獨被深慈凡飲食藥餌須
經夫人之手然後即御長姒亦頗嚴厲夫人事之如姑
或被誚責怡聲致拜由是閨門之內不肅而成及罹共
姜之哀更全孟母之訓諸孤稍長教以學文為之擇師
友為之致經籍凡學舍賓餘之所須者輟衣食捐簪珥
以奉之躬截髮之惠俾其親仁引斷織之言誠其中廢

故諸子皆立門戶如初越建隆二年秋七月十日終於
鄭州私第享年四十有五長子格大理寺評事次子至
吏部侍郎兼祕書監吏部以文學冠時擢高第於聖鑒
以才業膺世參大政於中樞以疾告罷復為少宰天子
祕書於中禁命我專掌式恢文教時人榮之先是少師
之葬也世猶多故禮或有闕及夫人祔也塋地逼隘介
於羣冢之間君子曰非安神之宅也即以端拱元年冬
十二月十三日改卜於鄭州管城縣某鄉里原禮也鉉

鄉里遼窳聲慶致睽竭來京師獲與吏部游處覩于公
高門之盛知臧孫有後之由公之行實皆聞於輿論或
得於家老梗槩而已不能備舉也金石之紀宜在鴻儒
惠然見顧辭不獲命謹為銘曰

天生賢人以佑民生生民數奇賢人隱淪修之於家富
以其隣里閭率化宗族歸仁樂天知命全和保真鳳凰
于飛以况嘉耦伯鸞之妻士行之母婉淑宜家嚴慈啟
後金鉤鵲印魚軒紫綬令問無已流光不朽刻此貞珉

高深共久

大宋故尚書戶部郎中王君墓志銘

公諱克貞字守節其先太原人也緱山之胄本固源深
淮水既微枝分派別所居占籍吳楚為多今為廬陵人
矣曾祖某不仕祖某贈吉州別駕考某屯田郎中君弱
不好弄幼善屬文風骨峻整器度閒雅年未及冠名聞
於時自唐室之季詞場道喪江左延祚復覩舊章翰林
學士江君文蔚典司春官詳求藝實取人至寡較文尤

精君一舉擢第首冠諸子時人以為追蹤元和之際矣
明年以祕書省正字釋褐宣直樞近專掌文翰之任措
詞典雅叙事詳審守位以慎當官以勤由是二十餘年
累遷至中書舍人樞密副使未嘗他任求之前載亦為
異矣及末葉多故時政浸衰唯吾守道中立不涉浮議
及宗國淪喪策名天朝自太子中允歷戶部兵部二員
外郎禮部戶部二郎中典漢滑襄梓四州事皆以寬簡
為務仁愛推誠當時之不名臣僕長孺之擇任丞史是

故民以之睦政以之修端拱二年秋自梓潼還至京九月十八日遘疾終於興州之傳舍享年六十明年某月日葬於揚州某縣鄉里禮也夫人隴西縣君李氏早亡無子女一人許適鹽鐵使諫議陳某惟君有文雅之用有周慎之誠言行相顧光塵不異奉職無廢舉在私無情容歷夷險而不回保始終而無吝初君始徙鄉薦余已典論詰謬為先達屢辱請益及余消長在運而君金石不渝古人之風於是在矣已悲深谷更聞逝川發為

哀詞識彼泉戶銘曰

猗嗟夫君心冥氣純英英達士疊疊詞臣不愆於位有
惠於民無悔無咎不緇不磷吉往凶歸道悠運促旋自
九折復於左轂駟馬悲鳴市人行哭邈矣彼蒼云何不
淑悠悠邇水隱隱崑岡慈親臨奠令季持喪旁羅宰樹
下閔玄堂郊原掩靄雲日冥茫痛光塵兮永已念蘭菊
兮徒芳

大宋故尚書兵部員外郎江君墓志銘

君諱直木字子建尋陽人也廬九之地時生俊才忠壯之族世著南國末葉堙替與時汙隆儒墨退讓垂為家法曾祖晁祖蟪考隲皆不仕伯父夢孫與先君同隱廬山以經學大義自娛伯父後膺宰府之辭自求絃歌之任報政罷去復隱舊山孝友貞清鄉里推服先妣李氏方娠夢神人授以直木一本寤而生君故取名焉幼而穎悟生知經義七歲以神童擢第未幾丁先公憂至性孺慕宗族稱歎孜孜色養無復官情學古屬文惟日不足

爰及弱冠遂以詞藝知名其為文清淡簡約自為品格
尤長於古風詩家居凡二十五年親友敦諭乃從常調
釋褐太常寺奉禮郎轉江都縣主簿直以事上不失其
恭勤以率下異舉其職民從其化吏服其能府尹陳玄
藻縣令路儀皆恃才傲物獨推重於君以為不如也改
江夏令其理如初鄂州何洙武勲致位性復暴桀亦加
優禮異於餘人嘗視君舉止迂緩車服朴野輒怡然而
笑每謂諸寮屬曰君輩稱為儒生不學江令也秩滿改

蘄州黃梅令議者以為屈君以鄉曲俯接欣然而往踰
歲遷歙州黟縣令會宗屬封建妙選府寮授君記室之
任處平臺複道之地列璫簪珠履之間清節素風凜然
不改正詞直道動必盡規府君甚重之十有餘年累遷
至水部員外郎賜緋而記室如故庚午歲府君奉使天
朝留鎮兗海授君奉寧節度判官檢校金部員外郎數
年遷司門員外郎判刑部今上元年加朝奉郎先君贈
大理司直先妣追封隴西縣太君視事三載求外任以

自效上以君恭勤詳慎宜久其職拜兵部員外郎仍兼
刑部享年六十有四居常康寧微病數日奄從物故時
太平興國五年冬十二月二十八日也即明年二月十
日葬於開封縣汴陽鄉豐臺里禮也前夫人封氏今夫
人太原縣君王氏皆有窈窕之質幽閒之操叶此貞節
蔚其門風長子敞京兆府醴泉縣主簿次曰用成用明
用澄用康用平用文用寧女二人曰慕昭用貞君生於
季俗世全素業性純貌古行潔文高守道安貧非禮不

動未嘗忤物亦不隨流真所謂鞠躬君子者矣風慧之
性稟於天資年十餘歲侍伯父食不過園蔬而已伯父
戲之曰啜白殮之羹淡而無味君應聲對曰齧紫茹之蒂鏗
爾有聲人知其當大成也余始聞其名晚乃識面察言
觀行重其為人藩房見選余所薦也亦既稱職頗嘗自
多丙寅歲與君俱年五十歲日會飲酒相與賦詩君先
就曰學易寧無道知非素有心余遂不復作也君有文
集二十卷嗚呼契濶夷險咨嗟年鬢一生一死孰克忘

情聊存挂劍之期故有刊銘之作其詞曰

嗚呼江君世濟其名生今之俗為古之人閨門侃侃鄉
里恂恂其實如秋其華如春握蘭有裕伏閣惟勤考終
歸全邈焉清塵葬於所沒古稱達者浚水長源夷門迥
野徒挂寶劍空馳白馬勝氣如存逝川不舍勒石垂芳
千載之下

大宋故陳留縣主簿贈太子中允李府君墓志銘

并序

府君諱某字廣途其先隴西逖道人仙源帝系蕃衍萬
邦隴西一族獨為鼎甲中葉徙官因家雍丘今為縣人
曾祖巢祖禮皆不仕考洪蔡州長史府君清明稟氣才
智夙成幼而屬文已洽時譽既志學通左氏春秋未冠
即為講說橫經請益虛往實歸微言奧義別為編錄年
二十三舉進士再不中第後唐天成初宗人璩為大宗
正見而器之曰王室多故吾道未光得祿而已何必是
也乃表為屬吏委以牋奏丞相鄭公珣奇君之能特除

蔡州汝陽主簿奏課連最改冀州南宮主簿於時朝運
告謝河朔多虞君內撫疲羸外給軍旅民安事集郡國
稱之澤潞節度侍中馬公存節聞其名辟為管記薦章
連上制命弗臨君知命之不遭乃謝病而退閉門却掃
以名教自娛漢氏初基羣心改屬親友敦喻復詣京師
直道而行馬往無吝又為興平河東二主簿秩滿以常
調當遷望令時皇運肇啟多士徇名君之次子巨源已
從鄉薦獲知於尚書陶公公時典選事謂曰丈人才高

運否遭迴下位區區一宰未足為光孰若復佐近畿以
便吾子之舉事不亦可乎乃除陳留主簿乾德六年春
三月四日終於縣署享年六十有八夫人追封瑯琊郡
太君王氏緱山仙派河洲懿德婦道以順家人用嚴睦
族惟和訓子由義以乾德三年月日先逝俱權殯於縣
之乾明寺至雍熙五年二月日合塋於開封府開封縣
吹臺鄉蘇村禮也子五人長巨舟早亡次巨源擢進士
第今為都官郎中鹽鐵副使次巨載以疾家居次巨川

巨卿及二女皆早夭惟君懷恬淡之性秉貞介之規孝於
奉親仁以睦族雅志宗道餘力攻文有孔墨之志無管
樂之遇淹翔末路從容自若所至之處輒構茅齋延高
士談讌終日曾無倦容嘗謂諸子曰吾志在大名非欲
夸世欲行吾道爾時命不偶古則皆然汝輩宜勉成吾
志也而巨源果能奮竒藻捷高科際會聖明騫翔臺閣
長才利刃應用忘疲追遠之澤漏於泉卜宅之儀由乎
禮積善之家斯在大名之應何慙仁人孝子正當如是

鉉嚮風斯久傾蓋甚歡不朽之文惠然見託賢賢善善翰墨之任也故采家牒勒於貞珉其詞曰

才高位下古實有焉積善餘慶神寧捨旃邈哉李君一時之賢其身則屈其道斯全餘慶伊何實有令子奉之以孝塋之以禮蜃輅同載佳城雙啟九原與歸三廟而祀遺愛被俗沒而不忘貞珉頌美久而彌芳阡如京兆地卽桐鄉綿綿瓜瓞永永流光

騎省集卷二十九

欽定四庫全書

騎省集卷三十

宋 徐鉉 撰

故唐慧悟大禪師墓志銘并序

士有佩服聖道闡揚師訓進不累於軒冕退不滯於丘樊惟勤身於濟衆不養高以絕俗其真仁人矣大禪師名沖煦字大明姓和氏昔者帝堯光宅天下我祖世掌天官保姓受氏冠冕百代在漢則調鼎之重在晉則專

車之賢末葉堙沈徙居固始先君從郡豪王氏南據閩
方今為晉安人也大禪師生稟異秀幼挺玄機年十有
五詣鼓山興聖國師出家即具戒品博覽經史雅好文
詞郡多俊秀咸見推仰証無為之理演不言之教綽為
先達端然妙門居城北之昇山於時王氏哀淪亂臣專
恣淫刑飛語虐及善人大禪師杖策去之適臨川郡中
書令宋公齊立作鎮南楚頗尚空玄聞師之來遠加延
納言意不合拂衣而行下至池陽郡守王公繼勳鄉國

之舊賓禮甚渥時季唐二葉像教方興嗣君聞其名召
與之語移晷而罷眷矚殊優命居光睦禪院復遷長慶
道場俾與儲貳游處實羽翼也後主即位恩旨加隆特
賜法智禪師之號廬山開先禪院者嗣君所創真容在
焉命大禪師居之精嚴修奉之儀以申固極之感君數
數召還建康止報恩禪院加號慧悟大禪師名其所化
曰智度堂精廬櫛比選勝而處禮秩之數有踰於前出
則居奉先道場入則居淨德內寺開寶七載夏六月寢

疾旬餘乃與大衆論生死之理十九日清旦上疏告辭
後主遣使問之至則化矣享年五十有九住法四十四
年即其月二十五日從西域之禮收靈骨葬於鍾山之
陽禮物官給中使監護至某年月日弟子省才遷於廬
山某所遵理命也大禪師風骨秀整機神穎悟博談衆
藝綜以玄談王公大人咸所欽尚鉉非學釋氏者不能
言其道業徒以傾蓋之分久要不忘今京師復與才公
胥會才公以文藝精敏見重於時永惟嚴師之義願刊

不朽之迹嘉其偉志為作斯銘銘曰

慧悟禪師釋雄之奇有文飾已有道應時生延世寵沒
有遺思歸舟翩翩九江之涓廬峰勝境蓮社餘基門人
稟訓遷神於茲衰翁懷舊勒銘誌之蘭菊無絕高深與
期

故唐衛尉卿保定郡公徐公墓志銘

公諱迪字昭用東海人也仁義之胄繁衍萬邦別族於
太史者十家因封而占籍者四郡而有郟之邑鉅人實

多著於簡編可以揚揜唐室云季天下崩離江淮之間
獨為漢守惟我大父首從義兵受遺輔政同伊尹之相
太甲字孤立後如有虞之保少康故得勲銘鼎鐘世享
茅土連姻合族與國存亡考諱知詢為江西節度使公
生於郡解方孩而孤四歲免喪即加五品之服幼學就
傳遂疏百里之封立朝侍祠恩禮優渥自太子中允累
遷至衛尉卿天資嚴肅常持謙下之禮世祿隆盛每存
恭儉之規不讀非聖人之書自為保家之主思不出位

時無間言始終一心出入三紀嗚呼星迴日薄棟折榱
崩命有所懸義無苟免享年四十有六開寶八年冬十
月二十有八日沒於難明年春三月權窆於大塋之側
至某年月始備大葬之禮卜祔焉夫人王氏張氏劉氏
皆早世並南朝之名族享小君之命數壺儀婦順彤史
存焉子太素太初太沖等皆修令名不墜前訓故能以
淪胥之後具飾終之禮奉先之孝時以為難宗人永懷
是有紀述辭曰

於惟我宗昭時顯庸積德垂範爰生我公入孝出悌夷
心直躬生能業官沒不忘忠是有慶靈鍾於令子不墜
其訓葵之以禮謀卜謀筮維桑維梓神道永謚流光不
已來者難誣斯之用紀

故唐朝散大夫尚書水部郎中崔君墓志銘并序

公諱致堯字用之其先清河人也周室大風肇洪源於
公望漢庭明月抗忠節於季珪德厚流光謀孫翼子冠
蓋之盛莫之與京我高祖翼高有唐四至丞相曾祖蠡

不仕祖潯吏部員外郎考億建州建陽令值天下亂因
而家焉今為建安人也君少而不羈長而好學介然如
石非禮不行鄉曲之名藉甚於世季唐嗣業博采時才
君以卿族之秀獻書求試補江州彭澤縣滁州清流二
主簿改建州浦城軍判官所至有聲應用不暇再為建
州將樂令其地巖險其民獷悍寇攘亡匿率以為常君
厲以嚴明信其刑賞汙俗咸革比戶安居遂獲貞幹之
稱又遷紀綱之任改常州錄事參軍連考善最擢拜殿

中丞遷虞部貲外郎郡國之政多使案治志身徇節綽
有能名無何都下受兵羣帥入援以君為水部郎中實
掌軍饋既而時運告謝宗社淪胥諸侯之師莫不卷甲
君與其部將南趨建安中塗衆潰遂沒於難春秋若干
嗚呼興亡之數聖賢安能免忠義之節顛沛必於是不
然何以見伯夷首陽之風王蠋布衣之操也夫人吳氏
克有婦德能緝素風藐是流離不墜門閥子憲實定等
皆稟庭訓咸修詞業憲在舊國以進士擢第入朝為潁

州沈丘尉復徙州里之舉皇上臨軒親試又擢高科為
隨州觀察推官所謂善人必有餘慶某年月日憲等始
脩大葬之禮號奉靈柩寔於某州縣鄉里之原禮也鉉
素熟君行學因銘墓焉銘曰

嗚呼崔君百世清芬徇國忘身斯為貞臣種德垂訓斯
為慶門芄芄故園峩峩高墳沒而不朽用勒斯文

故汝南縣太君周氏夫人墓志銘

并序

夫人諱某字某廬江舒人三國時吳將公瑾之後公瑾

葬於舒之宿松今裔孫奉祀者百餘家雖降存畎畝而時生間傑烈考諱本幼而遇亂自奮從軍吳王創基功冠諸將季唐建業位列宗臣官至中書令封西平王夫人即王之第某女也天姿玉瑩淑性川渟孝德內融柔儀外映既笄歸於徐氏府君諱某即唐相司徒公玠之第某子也於時江左方盛二族齊榮婚姻之貴雄視王謝而夫人雅性謙謹率由禮經至於蘋藻之嚴佩環之節澣濯之儉織紵之勤必以身先罔弗由道

宗族親睦人無間言府君仕為閣門副使殿中少監早卒四子皆幼夫人提攜教誨親授經書及其出就外傳已通孝經論語矣性曉音律而尚雅聲善絲竹而精琴瑟習孝經而宗玄言齋居諷誦未嘗懈怠雖閨門之內常以慈撫而家人之節有若嚴君故其門風肅然先業不墮豈非天和充已而道氣感物者歟春秋四十八開寶九年正月二十一日終於建安瑞里官舍其年二月葬於江寧縣鳳臺鄉婁侯里長子某亦為諸司副使及

入朝為京兆府醴泉令陝州錄事參軍公府交薦遂升
閨籍太子右贊善大夫夫人始以子貴授汝南縣太君
至是朝命復追榮焉次子繼宏舉進士次繼宇次繼闕

次宗初夫人之亡會宗國淪覆窆之事不暇如儀至
太平興國某年月日繼崇等始改窆於某所祔大塋焉
禮也鉉與西平諸子辱為交游及相府宗黨復敦事舊
故得以門內之理為隧道之銘傳於無窮斯為實錄銘
曰

侯藩之子相門之嬪道高萊婦德劬陶親猗歟彤管永
世芳塵生榮歿哀何必眉壽粉田啟邑斯為不朽令子
承家斯為有後孤卻降替二族依然谷陵遷貿松楸附
焉謂天蓋高福善胡愆勒銘泉戶蘭菊綿綿

大宋故亳州蒙城縣令賜緋魚袋曾君墓志銘

君諱文照字知章其先魯人百行之先垂為家法子孫
蕃衍不墜其聲末葉因官徙居南楚今為廬陵新淦人
也祖朴考福皆不仕君生稟異氣卓然老成六經蘊旨

有若夙習於時江表之地唐室猶興憲章文物不失舊
典君年七歲應州里之舉以神童擢第選滿補江州東
流尉遷靖安句容二尉皆以清白敏惠承上率下和而
有正能不自矜連考殊尤擢為吉州太和令桑梓之地
瓜李多嫌君閨門之行素修童艾之情已信而復臨事
能斷盡公無私由是暮年政成就賜朱紱會宗國淪覆
舉族入朝授亳州永城令舟車輻輳之地郵傳旁午之
塗盤根錯節發硯靡滯事無愆素民不告勞上疏論以

一邑之衆供列郡之賦指引利害較然可分詔特許免其縣挽船夫歲省萬計改蒙城令其理益精頃之河南大蝗獨不入城之境於是吏民相率詣關借留優詔褒美許留三載會王師北討君督本縣運輸深入虜庭危而復濟既還遇疾以雍熙三年四月日終於永城傳舍享年若干初君之赴選也余遇之於建康察言觀行知為良士因以表甥女姜氏妻之有子六人女八人君之從仕世途多故王事靡盬不遑顧私雅志未申中路早

世唯第三子乾度再舉進士名聞場中有後之慶當在
於此即以某年月號奉靈柩歸葬於某鄉里祔大塋焉
禮也嗚呼姻舊之故豈無他人援毫濡涕識彼陵谷其
銘曰

有惠於民死事以勤嗚呼曾君永世清芬仙山之陰章
江之濱考終歸全下從先人刻茲琬琰垂示後昆

故唐內客省使知忠義軍檢校太傅尚公羨道銘
公諱全恭字子初其先清河人也粵若天監代商文王

受命渭濱卜獵尚父膺期實始華宗誕彰餘慶在漢則
丘園之盛德在唐則藩屏之名臣蕃衍孫謀著之家牒
祖慤潤州館驛巡官因家焉考公廼為昇州牙將為郡
守馮鐸使於淮甸與吳武王議疆事抗詞奮勵誓不辱
命明年而馮氏兵敗悉衆歸於廣陵吳王得之甚喜曰
汝為馮公詬我真義士也今事我無易爾心即以右職
處之賜與甚厚由是感激知己竟死事于鄱陽以故三
子皆獲叙錄累贈右千牛將軍公即第三子質性端慤

容貌矜嚴吉人寡詞非禮不動季唐有國公仕為客省承旨先主器之特加任使凡所授職皆與先達長者侔勤以繼之所至皆理累遷至館驛副使嗣君即位轉閣門副使遷客省引進使凡時務制獄多命公與焉循理持平甚獲時譽宣布詔命出納必信監護師旅威惠得中不從諛以取容不矯激以忤旨故考績無玷而主恩益深累遷內客省使後主即位兼領閣門使遙領婺州刺史初國之戈船皆屯于石頭城之後盧龍鎮改命曰

龍安軍旅之重任也於是復兼龍安軍使明年改潤州
監軍使權領州事善於為政大治民謠逾歲徵還遙領
饒州觀察使兼左龍衛神武護軍公固辭兵柄閩嶺之
地巖險遼遠鎮守之寄常以為難又命公知忠義軍兼
建州事莅政三載建人安之會都下受兵羽檄相望公
調發軍實應接舟師奔命之衆道路相望猶以不獲身
先憂憤成疾朝廷方命公為節度觀察等使留後檢校
太尉使者未至甲戌歲冬十一月二十五日卒於公署

享年七十以十二月二十三日葬于建安縣某鄉某里
前夫人蘇氏繼室安樂縣君孫氏皆早卒子三人審元
審庸審能公以忠烈之風處親近之職守以周固齊以
法度身貴而志遜祿厚而持廉凡同列者使于諸侯率
多貪求浸以成俗公獨淡然無取出入垂橐士君子以
此重之及邦國淪胥豪右降替向聚斂者翦焉無餘唯
公令嗣克家門族如故識者知有天道焉鉉少參近密
與公常接言笑道義相期有若寮舊聲塵永已慷慨長

悲惜其風猷思有論撰昔裴子野之卒湘東王為誌矣而邵陵王又銘於羨道羨道有銘自此始也故仰前躅追而銘云

表海之慶世載厥聲展矣君子心純道貞恭職軒階申威禁營將命四方宣風百城哀哉不淑永矣忠誠舊國永泰交情死生濡毫頌美愴愴沾纓

故鄉貢進士劉君墓誌銘

君諱鵬字仲翔其先彭城人也炎靈之裔繁衍萬邦占

籍廬陵蓋重世矣高祖曾皆不仕父雄嘗從九江辟司
兵掾自免去職閨門之教不肅而成有三子君其仲也
質性純素智識聰敏年十有五則知屬文未及弱冠馳
名矣至於事親孝事長悌與朋友信接鄉黨讓動不違
禮居常慎獨故州里耆耆與時之名輩推重焉郡舉茂
才擢升上第明年而宗國淪覆君慨然知時之不利也
於是閉門却掃為學益勤以為今之文人率以詞賦取
高先王之教化蓋蔑如也乃撫天下之務論古今變著

法語八十一篇大抵宗尚周孔以質百氏之惑視其書
知其人矣皇宋二聖崇古尚文郡國孝秀親臨考覆君
以詞場舊望復為本郡升聞余與翰林學士賈公承詔
先考第於南宮賈公重君之文以為古人之後也乃第
為高等而君徇難進易退之質稟內敏外愚之容及其
敬庭復不中選退還鄉里篤行如初雍熙三年九月卒
於家享年四十有三嗚呼有才有時命不我與自古同
歎可勝道哉遺文累哀不朽之謂也即某年月葬于本

縣化龍鄉折桂里之原禮也君娶郭氏先十日而亡子師望文綺皆得父風其有後矣二女長適太原郭方次適隴西李某師望以鉉為父之知己也故千里號訴求誌其墓云詞曰

嗚呼劉生江楚之英才識蕪茂時命難并沒於白屋閔此泉扃立言可法何必浮榮刻茲貞石永爾高名

騎省集卷三十